

Njira ya Uhonokio

Uhoro c wotho wandikitwo Maandiko-ini
niwekiriruo ni Ngai ngoro-ini ya muwandiki.
(2 Timotheo 3:16)

sgm

Scripture Gift Mission
Eccleston Street, London, SW1W 9LZ
Printed in Great Britain

Ūhoro wa Ngai wī muoyo, na wī na
ūhoti, na wī ūūgī gūkīra rūhiū o ruothe
rūnoretwo mīena yerī. (Ahibirania 4:12)

Ūhoro ūrīa ūkoima kanua gakwa . . .
ndūkanjokerera o ro ūguo tūhū, no nī
kūhingia ūkahingia ūndū ūrīa nyendete
wīkwo, na ūrute wīra ūrīa ndaūrekeirie,
wagīre wega. (Isaia 55:11)

Mohoro maku magītaūrūo nīmarehage
ūtheri. (Thaburi 119:130)

Kũũmbwo gwa thĩ

O kĩambĩrĩria-rĩ, Ngai aatũmire kũgie matu-inĩ na gũkũ thĩ. Na Ngai agĩkiona atĩ kindũ o gĩothe kĩria ombĩte nĩ kĩa mũno. (Kĩambĩrĩria 1:1, 31)

Indo ciothe ikĩgia ciagũire na ũndũ wake, na kindũ o gĩothe kĩria kĩgũite, gũtiri kiagũire we atarĩ ho, o na kĩmwe. (Johana 1:3)

Kũũmbwo kwa andũ

We Ngai agĩgĩtũma kũgie andũ, matariĩ ta mũhianĩre wake we mwene, agĩgĩtũma magie na mũhianĩre o ta wa Ngai; agĩtũma magie kuo mari mũndũ mũrũme na mũndũ mũka. Nake Ngai agĩkĩmarathima. (Kĩambĩrĩria 1:27-28)

Nake Jehova Ngai akiũmba mũndũ na rũkũngũ rĩa thĩ, agĩcoka akĩmũhecherera mĩhũmũ ya muoyo na marima ma iniũrũ; nake mũndũ ũcio agĩtuĩka mũndũ wĩ muoyo. Naguo mwena ũria riũa rĩrathaga, Jehova Ngai agĩthondeka

mūgūnda mūirigire, o kūrīa gwetagwo Edeni, na akīūhanda; na nīho aagire mūndū ūcio ombīte. (Kīambirīria 2:7-8)

Jehova Ngai agītwara mūndū ūcio ombīte akīmūiga mūgūnda ūcio warī kūu Edeni, aūrutage wīra, na aūikaragie. Nake Jehova Ngai agīatha mūndū ūcio, akīmwi-
ra atīrī, Mūti o wothe ūria wī mūgūnda ūyū-rī, nūrekereirio ūūriage; no rīrī, mūti ūria wa kūmenyithania wega o na ūūru, ndūkanaūrie, nī gūkorūo mūthenya ūria ūkaūria, no mūhaka ūgakua.

(Kīambirīria 2:15-17)

Gūtonya kwa mehia

Na rīrī, nyamū-ya-thī yari na ūhinga gūkira nyamū o na irīkū thūnī wa nyamū iria ingī cia gīthaka iria Jehova Ngai ombīte. Nayo īkiūria mūndū mūka ūcio atīrī, Anga Ngai nioigite atī mūtikanarie mūti o na ūmwe wa mūgūnda ūyū?

Nake mūndū mūka agīcokeria nyamū-ya-thī, akīmūira atīrī, Maciaro ma mīti ya mūgūnda ūyū, tūrī etikīrie kūmarīa;

no riri, ha ũhoro wa maciaro ma mũti ũria wi mũgũnda gatagati-ri, Ngai oigite atiri, Mũtikanamarie, o na kana mũmahutie, ni getha mũtigakue.

Nayo nyamũ-ya-thi ikũira mũndũ mũka atiri, Aca, ti ati no mũhaka mũgakua, ni gũkorũo Ngai nioi ati mũthenya ũria mũkamarĩa, hĩndi io maitho manyu nĩmakahingũka, mũtuĩke o ta Ngai, mũmenyage wega o na ũũru.

Nake mũndũ mũka ũcio riria onire ati mũti ũcio ni mwega wa kuuma irio, o na ati ni wa kwendeka ũkionwo na maitho, o na ningi ati ni wa kwiriririo ni ũndũ wa kũũhigia mũndũ, agigitua maciaro maguo, akimarĩa; o na ningi akihe mũthuriwe nake, o nake akiria.

(Kiambiriria 3:1-6)

Jehova Ngai agũta mũndũ ũcio, aki-mũũria atiri, . . . Kai ũrũte mũti ũria ndagwathire ngikwira ndũkanarie? Nake mũndũ ũcio akiuga atiri, Mũndũ mũka ũria wa'heire tũtũũranie nake, niwe

ũ'heire maciaro ma mūtī ūcio, na nī ndarīa.

Nake Jehova Ngai agīcoka akīūria mūdū mūka ūcio atīrī, Ūguo wīkīte nī atīa? Nake mūdū mūka akiuga atīrī, Nyamū-ya-thī nīyo ī'henereirie, ndarīa.

Nake Jehova Ngai akīra nyamū-ya-thī atīrī, Tondū wa ūndū ūcio wīkīte-rī, thīnī wa mahiū mothe, o na thīnī wa nyamū ciothe cia gīthaka, wee nīwatūūra wī mūthahu; gūthī ūrīthiaga na nda, na kūrīa ūrīriaga rūkūngū matukū mothe ma muoyo waku; na ningī nīngūtūma inyui na mūdū mūka ūyū mūgīe ūthū, o na mbeū yaku na yake igīe ūthū; mbeū yake nīgakūgūtha mūtwe, nawe nīukamīgūtha ndīira ya kūgūrū.

Ningī agīcoka akīra mūdū mūka atīrī, Nīngūkūingīhīria mūno thīna waku na mītangīko ikonī ūhorō waku wa kūgīa ihu; ūrīciaraga twana na ruo, na ningī merirīria maku nīmarīkūgucagīrīria kwī mūthurīguo, nake nīarīg-wathaga.

Ningi akūra Adamu o nake atiri, Tondū wee nawe niwitikirire kũigua mũgambo wa mũkaguo, waria mũti ũcio ndagwathire ngikwira ũũ: Ndũkanaũrie; tondū wa ũhoro ũcio-rĩ, tiri niwatũura wi mũthahu ni ũndũ waku; ũrĩriaga irio ciaguo o na thina matukũ mothe ma muoyo waku; naguo niũgũkũmerera mũigua, na mahiũ ma nyeki-inĩ, na ũrĩriaga tũhuti o twa mũgũnda; irio ciaku-rĩ, ũriciriaga na thithino ya ũthiũ waku, o nginya riria ũgacoka tiri-inĩ; ni gũkorũo nĩkuo warutirũo; amu wee ũri o rũkũngũ, ningĩ ũgacoka ũtuĩke o rũkũngũ.

(Kiambiriria 3:9, 11-19)

Nyamũ-ya-thĩ o iria ya tene, na noyo ũria wĩtagwo Mũcukani na agetwo Shaitani, ũria ũhitithagia kirĩndĩ gia thĩ gĩothe.

(Kũguũrĩrio 12:9)

Kwĩhia kwa mũndũ ũmwe-rĩ, nĩkuo gwatũmire mehia matonye gũkũ thĩ, nakio gĩkuũ gĩgĩtonya ni ũndũ wa mehia;

tondũ ũcio gĩkuũ gĩgĩkĩhunja kũrĩ andũ
othe, nĩ gũkorũo nĩmaakũĩhirie othe.

(Aroma 5:12)

Andũ nĩmatuĩtwo ehia mbere ya Ngai

Ithuothe nĩtũtigite njĩra ĩrĩa njega, nĩ
gũturura tũtururite ta mbũri, o mũndũ
agathiĩ na njĩra yake mwene. (Isaia 53:6)

Jehova nĩaacũthĩrĩirie ciana cia kirĩndĩ
arĩ igũrũ, arore kana kũrĩ o mũndũ
mũũgĩ, mũndũ ũrongoragia Ngai. Othe-rĩ,
nĩmarĩkitie kwehũka; nĩ kũbutha mabu-
thite othe hamwe; gũtikĩrĩ wĩkaga wega,
gũtirĩ o na ũmwe. (Thaburi 14:2-3)

Nĩkwandĩkitwo atĩrĩ: Gũtirĩ mũndũ
mũthingu o na ũmwe. Njĩra ya thayũ
matimĩũ. Maitho-inĩ mao-rĩ, hatĩrĩ na
ũhoro wa gwĩtigĩra Ngai. Andũ othe
maanahĩtia, magakĩaga gũkinyĩrĩra riri wa
Ngai. (Aroma 3:10, 17-18, 23)

Mawaganu manyu nĩmo mamwamũranĩ-
tie makamũtigithania na Ngai wanyu,

namo mehia manyu nimo matūmīte
amūhithe ūthiū wake. (Isaia 59:2)

Wendo wa Ngai kūrī andū

Ngai, tondū wa ūria endete kīrīndī gīa
gūkū thī, nīaarutire Mūrū wake wa
mūmwe, nī getha mūdū o wothe
ūmwīhokete ndakore, no agīe muoyo wa
tene na tene. (Johana 3:16)

Akīhoya Ngai, Jesu oigire ūū: Muoyo
wa tene na tene nī atīrī, nī makūmenye
wee Ngai ūria ūmwe wa ma, na mamenye
ūria warekirie, na nīwe Jesu Kristo.

(Johana 17:3)

Ūhoro ūria wendani wa Ngai wonanirio
naguo harī ithuī nī ūyū, atī Ngai nīaare-
kirie Mūrū wake wa mūmwe oke gūkū
thī, nī getha tūgīe muoyo nī ūndū wake.
Wendani nī ūū; ti atī nī ithuī twendaga
Ngai; indī nīwe watwendaga ithuī,
agīkīrekia Mūrū oke atuīke ihaki rīa
mehia maitū. (1 Johana 4:9-10)

Gũũka kwa Mũrũ wa Ngai gũkũ thĩ

Hĩndĩ yakinya irĩa njagĩrĩru kũna-rĩ,
Ngai akĩrekia Mũriũ. (Agalatia 4:4)

Ūhoro ũyũ nĩguo wa kwĩhokeka, na
nĩguo wagĩrĩre gwĩtikĩrũo kũna, atĩ
Kristo Jesu okire thĩ ĩno ahonokie ehia.

(1 Timotheo 1:15)

Aarĩ gũkũ thĩ, o nayo thĩ ikĩgĩa yagĩre
na ũndũ wake, nakĩo kĩrĩndĩ gĩa gũkũ
thĩ gĩkiaga kũmũmenya. (Johana 1:10)

Gũciarũo kwa Mwathani Jesu

Gũciarũo kwa Jesu Kristo gwatariĩ ũũ:
nyina Mariamu orio nĩ Jusufu, matano-
nana, akĩonwo arĩ na ihu rĩa Roho
Mũtheru. Na rĩrĩ, maũndũ macio mekirũo
nĩ getha ciugo irĩa cioigĩrũo nĩ Mwathani
na kanua ka mũnabii ikinye, rĩrĩa oigire

atĩrĩ: Onei, mũirĩtu nĩakagĩa ihu, na
aciare kahĩ, nako gatuwo Imanueli;
ũguo naguo ũgĩtaũrũo, nĩ kuuga, Ngai
hamwe na ithuĩ. (Mathayo 1:18, 22-23)

Nĩũgagatua JESU [Mũhonokia], nĩ ũndũ
nĩwe ũkahonokia andũ ake mehia-inĩ mao.
(Mathayo 1:21)

Mwathani Jesu e gũkũ thĩ

Ngai aaitiriirie Jesu wa Nazarethi Roho
Mũtheru o na hinya; nake agĩcanga
agĩkaga maũndũ mega, na akĩhonagia
andũ arĩa othe maatũire manyariragwo
nĩ mũcukani: nĩ gũkorũo Ngai aarĩ
hamwe nake. (Atũmwo 10:38)

Jesu agĩcanga matũũra-inĩ mothe na
mĩcĩ-inĩ yothe, akĩrutanaga thunagogi-inĩ
ciao, o akĩhunjagia Ũhoro-ũria-Mwega
wa ũthamaki, na akĩhonanagia mĩrimũ
yothe, o na ndũari ciothe.

(Mathayo 9:35)

Kirindi kuingi gigiuka kuri we, kirehete andu aria maathuaga, na atumumu, na aria mataahotaga kwaria, na cionje, na angĩ aingi, gikimaiga maguru-ini make; nake akimahonia. (Mathayo 15:30)

Mwathani Jesu nioigire mbere uhoru wa gukua gwake na kuriuka

Ni kuruta aarutaga arutwo ake uhoru, akimera atiri; Muru wa mundu ni wa kuneanwo moko-ini ma andu, nao ni kumuruaga makamuruaga; nake aarikia kuruagwo, thutha wa mithenya itatu niagacoka kuriuka. (Mariko 9:31)

Mwathani Jesu nioigire atiri: Ni ni muriithi uria mwega. Muriithi uria mwega niarutaga muoyo wake ni undu wa ng'ondu. Niki Ithe witu anyendete, ni undu nguruta muoyo wakwa, ni getha njoke ndiuyukie ringi. Gutiri mundu ukundunya; ni ni nguruta, ni

mwene. Ndī na rūtha ndiūrute, na ningi
ndī na rūtha njoke ndiūiyūkie ringi.
Nīndaathirūo ūguo nī Awa.

(Johana 10:11, 17-18)

**Mwathani Jesu nīaakuire
mūtharaba-inī nī ūndū wa mehia
maitū**

Maakinya handū hetagwo Kībuuri, hau
nīho maamwambūire mūtī igūrū . . .
Nake Jesu akiuga atīrī, Awa, mohere, nī
gūkorūo matikūmenya ūria megwīka.

(Luka 23:33-34)

Nīaamenirūo o na akīregwo nī andū; nī
mūndū wī kīeha, ūrūite thīna . . . Ti-itherū
ruo ruitū nīwe waruoire, o nakīo kīeha
giitū nīwe wagīkuuire; no ithuī tūkīmuona
ta ahootekete e mūhūre nī Ngai, o na
akanyarirūo. No rīrī, aatihirio nī ūndū
wa mahītia maitū, o na akīhehenjwo nī
ūndū wa waganu witū; . . . na ithuī
tūhonagio nī ūndū wa mītunda ya kūrīa
aahūrīrūo. Ithuothe nītūtīgīte njīra irīa

njega, nĩ gũturura tũtururĩte ta mbũri, o mũndũ agathiĩ na njĩra yake mwene; nake Jehova nĩamũigĩrĩre waganu witũ ithuothe . . . Aathengirio oime kũri arĩa matũũraga muoyo. Nĩ kũhũrũo aahũrirũo nĩ ũndũ wa mahĩtia ma andũ akwa. Na rĩrĩa aakuire-rĩ, aagĩrũo mbĩrĩra-inĩ cia andũ aaganu, o na andũ arĩa itonga, o na harĩa atekĩte ũndũ o na ũrĩkũ mũũru, o na kana kanua gake gakiaria maheni o na atĩa . . . Nĩ gũkuua aakuire mehia ma andũ aingĩ; o na aagarari watho akĩmathaithanĩrĩra. (Isaia 53:3-6, 8-9, 12)

Kristo nĩakuire nĩ ũndũ wa mehia maitũ, o ta ũrĩa Maandĩko moigĩte.

(1 Akorintho 15:3)

Mwathani Jesu nĩariũkire akiuma kũri akuũ

Ūhoro wandĩkitwo Maandĩko-inĩ atĩrĩ, atĩ no mũhaka Kristo anyarĩrĩke, na acoke kũriũka oime kũri arĩa akuũ

mūthenya wa gatatū; na ningī atī ūhoro wa kwirira na wa kuohanirūo mehia ūkahunjirio ndūriri ciothe na rūtwa riake.

(Luka 24:46-47)

Niwe Ngai aariūkirie mūthenya wa gatatū, agūtikira atī acoke kuoneka—no ti kuonwo nī andū othe, tige o aira aria maathurirūo o mbere nī Ngai, nao nio ithui.

(Atūmwo 10:40-41)

Ūria kūrī, nī atī Kristo niariūkītio akoima kūrī aria akuū, agagītuika mūtūrio wa andū aria makomete. Amu kuona atī nī mūdū watūmire gūūke gīkuū, o ūguo ningī nī mūdū watūmire kūrīūka kwa andū aria akuū gūūke nakuo. Nī gūkorūo o ta ūria andū othe makuaga nī ūndū wa Adamu-rī, no taguo andū othe magacokio muoyo nī ūndū wa Kristo.

(1 Akorintho 15:20-22)

Mwathani Jesu nīacokire matu-ini

Nīconanirie kūrī o ari muoyo, thutha wa

kūnyamarīka gwake, na imenyithia nyingi itangīkararīka, akamonekagira ihinda rīa matukū mīrongo ina, akaaragia mohoro ma ūthamaki wa Ngai. . . . O mamū-cūthirīrie-rī, akīambatio Igūrū, na itu rikīmūiyūkia, matige kūmuona rīngī.

(Atūmwo 1:3, 9)

O We, ūrīa wouanirio e na mwīri, agītuwo mūthingu nī Roho, akionwo nī araika, ningī ngumo yake ikīhunjanīrio kūrī andū a ndūrīri ciothe, agīgūtīkio nī andū a gūkū thī, na akīiyūkio riri-inī kūrīa Igūrū.

(1 Timotheo 3:16)

Njīra ya Ngai ya kūhonokania

Ndīkiagiriirūo nī gwīka atīa nīguo 'honoke? . . . Itīkia Mwathani Jesu, na nīūkūhonokio.

(Atūmwo 16:30-31)

Ni ūndū ūcio-rī, wīrirei na mūgarūrūke,
nī getha mehia manyu marihūrūo.

(Atūmwo 3:19)

Mwīrirei, mūcoke mūbatithio o mūndū
o mūndū thīnī wa rūtwa rīa Jesu Kristo,
nīguo muoherūo mehia manyu; na
nīmūkūheo kīheo kīa Roho Mūtheru.

(Atūmwo 2:38)

Twakiumbūra mehia maitū, we nī
mwīhokeku, o na nī mūthingu, agatuohera
mehia maitū, na agatūtheria tūgathirūo
nī maūndū maria mothe matarī ma
ūthingu.

(1 Johana 1:9)

Ūngiumbūra na kanua gaku atī Jesu
nīwe Mwathani, o na gwitīkia witīkie
na ngoro yaku atī Ngai nīaamūriūkirie
oime kūrī arīa akuū, no ūhonoke: nī
gūkorūo nī ngoro mūndū etīkagia nayo
agagītuwo mūthingu, na nī kanua
oimbūrāga nako agakīhonoka.

(Aroma 10:9-10)

Ni wega wa Ngai watũmire mũhonokio
ni ũndũ wa gwĩtikia; naguo ũndũ ũcio
ndwoimanire na inyuĩ inyuene: no kũheo
mwaheirũo ni Ngai. (Aefeso 2:8)

Mũndũ o wothe ũgakaĩra rĩtwa rĩa
Mwathani niakahonoka. (Aroma 10:13)

Mwathani Jesu nioigire atĩrĩ: Mũndũ
ũũkĩte kũrĩ niĩ ndingĩmũingata o na
atĩa. (Johana 6:37)

Kũhonokio na ũndũ wa gĩkuũ gia Kristo

Thĩnĩ wa Kristo Jesu-ri, inyuĩ arĩa
mwaraihirĩrie nĩmũreharehetwo hakuĩ
ni ũndũ wa thakame ya Kristo.
(Aefeso 2:13)

Thakame ya Jesu, Mũrũ wa Ngai,
nĩtũtheragia tũgathira wĩhia wothe.
(1 Johana 1:7)

Ūiyūru wothe wa Ngai nīwetīkīrīre
gūtūūra thīnī wa Kristo; nīguo atī na
ūndū wake maūndū mothe macoke
kūiguithanio na Ngai, nī ūndū wa ūria
aarehire thayū na ūndū wa thakame
īria yaitirūo mūtharaba-inī wake.

(Akolosai 1:19-20)

Nīmwakūūrīrūo . . . ti indo ibuthaga ta
betha na thahabu mwakūūrīrūo nacio;
no nī thakame ya goro mūno . . . ya
Kristo.

(1 Petero 1:18-19)

Nī thīnī wa Kristo twakūūrīrūo, nī
ūndū wa thakame yake, o na tūkoherūo
mehia maitū kūringana na ūria Wega
wake ūingihite.

(Aefeso 1:7)

Muoyo wa mwīrī wī thīnī wa thakame
. . . thakame nīyo īhorohanagīria nī ūndū
wa muoyo ūria ūrī thīnī wayo.

(Alawii 17:11)

Mündū angikorūo ari thīnī wa Kristo-rī,
niagarūrūkīte agatuīka mündū ūngī
mwerū: maündū maria ma tene nīma-
thirīte; nī atirī, nīmatuīkīte mangī merū.

(2 Akorintho 5:17)

Roho Mūtheru

Mwathani Jesu nioigire atirī: Nī nīngahoya Ithe witū, nake niakamūhe Mūteithia ūngī, aikarage na inyuī tene na tene, na nīwe Roho ūria wa ma, ūria ūtangihota gwītikirūo nī kirīndī gia gūkū thī, nī gūkorūo gitimuonaga, o na gitimūūi; inyuī-rī, nīmūramūmenya, nī gūkorūo niatūire o na inyuī, na niakamūkara o ngoro thīnī.

(Johana 14:16-17)

Mūteithia, o ūcio Roho Mūtheru, ūria ūkarekio nī Ithe witū na rūtwa riakwa, we akamūruta maündū mothe.

(Johana 14:26)

Mūtikanaiguithie Roho Mūtheru wa
Ngai ũũru, o we ũria mwekirirũo rũũri
niwe o nginya mūthenya ũria wa gũkũũrũo
ũgakinya. (Aefeso 4:30)

Thiagai mūtongoretio nĩ Roho, na
mūtigeke maũndũ maria meriragĩrio nĩ
mwĩri. (Agalatia 5:16)

Andũ arĩa othe matongoragio nĩ Roho
wa Ngai, acio nĩo ciana cia Ngai.
(Aroma 8:14)

Mũiyũrũo nĩ Roho. (Aefeso 5:19)

Maciaro ma Roho nĩmo maya, nĩ wendani,
na gĩkeno, na thayũ, na gũkirirĩria, na
gũtugana, na gwĩkana wega, na kwĩhokeka,
na kũhorera, na kwĩgirirĩria merirĩria ma
mwĩri. (Agalatia 5:22-23)

Gūtũũra mūtũũrĩre mũtheru

Ūũ nĩguo Ngai enda, atĩ mūtũũke andũ
aamũre. (1 Athesalonike 4:3)

Mwathani Jesu niaahoire akiuga atĩrĩ:
Maamũre ũmatherie na ũhoru-ũrĩa-wa-
ma: ũhoru waku nĩguo ũhoru-ũrĩa-wa-ma.
(Johana 17:17)

Nĩtũtũũre o twĩhagia . . . ? Hĩ, tũroaga
gwĩka ũguo! Kai ithuĩ arĩa twakũire,
tũgĩthenga ũhoru-inĩ wa kwĩhia o
gũthenga-rĩ, tũngĩgĩtũũra atĩa o twĩhagia?
Inyuĩ, o ũndũ ũmwe, wionagei ta arĩ
gũkua mũkuĩrĩre ũhoru wa wĩhia
mũthenge hari guo, naguo muoyo ũcio
mwĩ naguo mũtue atĩ mũrĩ a gūtũũra
mūtũũrĩre werekeire o Ngai, mwĩ thĩnĩ
wa Kristo Jesu. (Aroma 6:1-2, 11)

Rĩu, tondũ mũkĩrĩ ohore mũkoima
ũkombo-inĩ wa wĩhia, na mũgatuĩka
ndungata cia Ngai-rĩ, nĩmũrĩ na maciaro

manyu harī ũhorō ũcio wa kwamūrũo
mũgĩtheragio, na marigĩrĩrio maguo nĩ
muoyo wa tene na tene. (Aroma 6:22)

Ngai Mwene thayũ we mwene aromwa-
mũra amũtherie kũna. Namo maroho
manyu, na ngoro cianyu, o na mũĩrĩ
yanyu iroikario irĩ ng'ima, na igakorũo
itarĩ na ũcuke, hĩndĩ irĩa Mwathani
witũ Jesu Kristo akoneka. Ũcio ũmwĩtaga
nĩ wa kwĩhokeka, nake nĩakahingia ũhorō
ũcio. (1 Athesalonike 5:23-24)

Kũhoya

Mwathani Jesu nĩoigire atĩrĩ: Ũndũ o
wothe mũkahoya na rĩtwa riakwa,
nĩngawĩka, nĩ getha Ithe witũ agooci-
thagio na ũndũ wa Mũriũ. Nii mwa'hoya
ũndũ o ũrĩkũ na rĩtwa riakwa, nĩngawĩka.
(Johana 14:13-14)

Mwaikara thĩnĩ wakwa, nacio ciugo
ciakwa ciaikara thĩnĩ wanyu-rĩ, hoyagai

ũndũ o ũria mũkwenda, na nĩmũgekwo
guo. (Johana 15:7)

Maũndũ o mothe maria mũhoyaga
mũkoiga mũheo, itĩkagiai atĩ nĩmũrĩkĩtie
kũheo, na nĩmũkagia namo.

(Mariko 11:24)

Kũhoya mũhoyage . . . hingo ciothe,
mũrĩ na Roho. (Aefeso 6:18)

Hoyagai mũtegitigithĩria; maũndũ-inĩ
mothe-rĩ, cokagĩriai Ngai ngatho; nĩ
ũndũ ha ũhoru wanyu-rĩ, ũguo noguo
Ngai endaga, e thĩinĩ wa Kristo Jesu.

(1 Athesalonike 5:17-18)

Gũtungatĩra na kũnyarĩrĩka

Mwathani Jesu nĩoigire atĩrĩ: Mũndũ o
wothe angĩenda kũnyuma thutha, nĩerege,
oe mũtĩ wake wa kwambĩrũo, anũma-
gĩrĩre. (Mathayo 16:24)

Ngai aahota gũtũma mũtũũre mũingĩ-
hĩrũo maũndũ mothe ma ũtugi wake,

nī getha inyuī, tondū wa gūkoragwo hingo ciothe mūiganītie wega indo ciothe iria imūbatairie cia kwīruta mabata manyu mothe-rī, mūkoragwo ningī mūi-
ngīhītie cia kūrutaga wīra o wothe mweга. (2 Akorintho 9:8)

Ikaragai mwirūmītie, mūtegūgīthengeka, na mūtūūre hingo ciothe mūrutaga wīra wa Mwathani na mūgakirirīria, nī ūndū wa kūmenya atī wīra ūria mwinogagia naguo ti wa tūhū mūkiūru-
taga mūnyitaine na Mwathani. (1 Akorintho 15:58)

Ha ūhoru wa Kristo, inyuī nīmwitīkirītio kūmwīhoka, na to kūmwīhoka gwiki, no ningī kūnyamarīka nī ūndū wake. (Afilipi 1:29)

Gūkena-rī, nī inyuī mūngīkorūo mūnyarirīkaga nī ūndū wa maūndū maria maagirīire. Tigagai gwītigira . . . o na kana mūtangīkage. (1 Petero 3:14)

Gũkenā-rī, nī inyuī mūngĩrumwo nī ũndũ wa rĩtwa rĩa Kristo, nī ũndũ Roho ũrĩa mwene riri, o we Roho wa Ngai, aikaraga igũrũ rĩanyu.

(1 Petero 4:14)

Kũhoya mĩhianano nĩgũkaananĩtio nĩ Ngai

Ngai nĩoigire atĩrĩ: Nĩ nĩ nĩ Jehova Ngai waku. . . . Ndũkanagĩe na ngai ingĩ tiga nĩ. Ndũkanethondekere mũhianano mwacũhie, kana mũhianĩre wa kindũ o gĩothe gũ kũrĩa igũrũ, kana wa kindũ gũ gũkũ thĩ, kana wa kindũ kũ maĩ-inĩ marĩa me mũhuro wa thĩ; ndũkanaciinamĩrĩre kana ũcitungatĩre; nĩ gũkorũo nĩ Jehova Ngai waku ndĩ Ngai wa ũiru.

(Thama 20:2-5)

Ngai icio ciothe cia irĩndĩ no indo itarĩ kiene, indĩ Jehova nĩwe wombire igũrũ.

(Thaburi 96:5)

Nĩtũũĩ o wega atĩ gũkũ thĩ guothe

mũhianano ti kindũ kũrĩ; na nitũũĩ ati
gũtirĩ Ngai tiga o ũrĩa ũmwe.

(1 Akorintho 8:4)

Ngai no ũmwe, nĩwe Ithe witũ, o we
kĩhumo kĩa indo ciothe, na ithuĩ aga-
tũtũũria no getha tũtuĩke ake; ningĩ . . .
Mwathani no ũmwe, nĩwe Jesu Kristo,
o we njĩra irĩa indo ciothe ciombirũo
nayo, na irĩa ithuĩ tũtũũragio nayo.

(1 Akorintho 8:6)

Jesu akĩmwĩra atĩrĩ; Thiĩ, ndiga, Shaitani,
tondũ ũhoru nĩwandikĩtwo, Turagia ndu
ũgoocage Mwathani Ngai waku, na
ũmũtungatagĩre o we wiki.

(Mathayo 4:10)

Nĩ ũndũ ũcio-rĩ, tuagai maũndũ ma
gũkũ thĩ marĩ thĩnĩ wanyu ta makuĩte;
namo nĩ maya, atĩrĩ, ũmaraya, na meciria
mathũku, na thuti njũru, na kwĩrirĩria
maũndũ moru, na gũcumĩkĩra, nakuo
no ũndũ ũmwe na kũinamĩrĩra mĩhianano
na kũmĩhoya. Maũndũ macio-rĩ, nĩmo

matūmaga marakara ma Ngai makinyagire andū. (Akolosai 3:5-6)

Ūgwati wa kūrega ūhonokio wa Ngai

Kai ithui na ithui tūkahonoka atia, tūnginyarara ūhonokio mūnene ūū?

(Ahibirania 2:3)

Ūria ūtoranitie niwe ūkagaya maūdū macio; na nii nīngatuika Ngai wake, nake atuike mūrū wakwa. No aria me guoya, na aria matetikitie, na imaramari, na oragani, na ahūri-maraya, na arogi, na ahoi mihianano, o na aria a maheni othe-rī, igai rīao no iria-ini thīni, rīria riakanaga mwaki wa ūbiriti; na nīkuo gūkua kūrīa gwa kerī. (Kūguūrīrio 21:7-8)

Ūria wihokete Mūriū e na muoyo wa tene na tene; nake ūria ūregete kūigua Mūriū, we ndakona muoyo; egūtūūra o arakarīrūo nī Ngai.

(Johana 3:36)

Nū ūmūkinyūirie inyūi ūhorō atī mūūrīre marakara marīa magoka? (Luka 3:7)

Kūhonokio harī ūūru na harī Shaitani

Ngai mwene thayū nīarīhehenja Shaitani o narua mūmūrangīrīre makinya-inī manyu. (Aroma 16:20)

Mūcokagīrie Ithe witū ngatho, we . . . watūhonokirie agītūruta watho-inī wa nduma, agītūthamīrīria ūthamaki-inī wa Mūriū ūrīa endete mūno.

(Akolosai 1:12-13)

Ūndū ūrīa watūmire Mūrū wa Ngai onithanio nī rīrī, nī getha atharūrie wīra wa mūcukani. (1 Johana 3:8)

Mwathani witū Jesu Kristo . . . nīerutire nī ūndū wa mehīa maitū, nī getha atūhonokie harī maūndū marīa moru ma mahinda maya tūrī, o ta ūrīa Ngai, o we Ithe witū endete. Nake arokumagio nginya tene na tene. (Agalatia 1:3-5)

Wiohei indo ciothe cia Ngai cia ita,
nī getha mūhote gwītiiria mawara ma
mūcukani. (Aefeso 6:11)

Ngai arogathwo, ari we ūtūmaga tūto-
ranie na ūndū wa Mwathani witū Jesu
Kristo. (1 Akorintho 15:57)

Gūcoka gwa Kristo

Nī gūcoka ngacoka, ndīmūtware mūgai-
karage o hari nū, nīguo harīa ndī, na
inyuī mūgiage ho. (Johana 14:3)

Jesu, o ro ūcio watwarūo Igūrū oime
hari inyuī, nīagacoka rīngī o ro ūguo
mwamuona agīthū Igūrū. (Atūmwo 1:11)

Mwathani we mwene nīagaikūrūka oime
Igūrū agūitanaga na kayū, o na mūgambo
wa mūraika ūrīa mūnene, naguo coro
wa Ngai ūkīhuhagwo: nao andū arīa
makuīte me thīnī wa Kristo nīo makaa-
mba kūrīūka: na thutha wa ūguo, ithuī
arīa tūgakorūo tūrī muoyo, o ithuī

tūtigaire-rī, nītūkoyanīrio hamwe nao
tūtwarūo matu-inī, nīguo tūgacemanie
na Mwathani o kūu riera-inī: tūgagī-
tūūrania ūguo na Mwathani o nginya
tene. (1 Athesalonike 4:16-17)

Rīria we akonithanio, tūkahaanana nake;
nī gūkorūo tūkamuona o ūrīa atariī.
(1 Johana 3:2)

Nī ūndū ūcio wihūgagei, nī gūkorūo
mūtiūī mūthenya ūrīa Mwathani wanyu
agoka. Nī ūndū ūcio o na inyuī ikaragai
mwīhaariīrie: nī gūkorūo Mūrū wa
mūndū niagoka thaa irīa mūtegereirie.
(Mathayo 24:42, 44)

Atirī, ngūūka o narua; naguo ūtungati
wakwa ndī o naguo ngahe o mūndū
kūringana na ūrīa wīra wake ūtariī.
(Kūguūrīrio 22:12)

Amen. No gūke, Mwathani Jesu!
(Kūguūrīrio 22:20)

Ibuku riri rii na ndeto irutitwo Ibuku-ini Riria Itheru Ria Ngai, niriio Uhoru wa Ngai; nacio ibangitwo kuringana na mohoro maagiriire. Twaguthaitha muno wigiriire Ibuku riu Ria Ngai wee mwene, urithomage, tondū rīo nī Uguurio wa Ngai hari andū othe.